

**Meeqqat atuarfiat pillugu Inatsisartut peqqussutissaattut siunnersuut**

**pillugu**

**Inatsisartut Kultureqarnermut Ilinniartitaanermullu Ataatsimiititaliaata**

**ILASSUTITUT ISUMALIUTISSIISUTAA**

**siunnersuutip pingajussaanneerpeqarnissaanut saqqummiunneqartoq**

Inatsisartut Kultureqarnermut Ilinniartitaanermullu Ataatsimiititaliaat suliarinninnermini ukuninnga inuttaqarpoq:

Inatsisartuni ilaasortaq Ruth Heilmann, Siumut, siulittaasuugallartoq  
Inatsisartuni ilaasortaq Jakob Sivertsen, Atassut, Naimangitsoq Petersen-imut sinniisussaq  
Inatsisartuni ilaasortaq Lars Karl Jensen, Siumut  
Inatsisartuni ilaasortaq Olga Poulsen, Inuit Ataqatigiit  
Inatsisartuni ilaasortaq Mogens Kleist, Kattusseqatigiit

Inatsisartut Kultureqarnermut Ilinniartitaanermullu Ataatsimiititaliaata UPA2002-imi aappassaanneerinerup kingorna meeqqat atuarfiat pillugu Inatsisartut peqqussutissaattut siunnersuummut allannguutissatut siunnersuutigineqalersaartut misissuataarpai.

Aallarniutigalugu Inatsisartut Kultureqarnermut Ilinniartitaanermullu Ataatsimiititaliaata Naalakkersuisunit soorlutaaq Inatsisartut sinnerinit isumaliutissiisutip siamasissumik taparserneqarnera ataatsimiititaliap qujassutigissavaa.

Atuarfiup siulersuisuini atuartut sinniisaasa aningaasarsiaqartitaanissaannik ataatsimiititaliap inassuteqaataa Naalakkersuisunit akuersaarneqarmat ataatsimiititaliap naammagisimaarpaa. Ineqarfiutigalutik atuartunut angerlarsimaffiit eqqarsaatigalugit Naalakkersuisut ataatsimiititaliap kaammattuutaanut isumaqataanerat ataatsimiititaliamiittaaq pitsaasutut isigineqarpoq.

Annertusissamik immikkut ilinniartitsinermut tunngatillugu KANUKOKA-p isummernerata ataatsimiititaliamit isumaqatigineqarmat Naalakkersuisunit tusaatissatut tiguneqarpoq. Pingajussaanerinnissamut Naalakkersuisut allannguutissatut siunnersuummik saqqummiussissamaarput, peqqussutissap nutaap atortuulersinneqarnerani perorsaanikkut, aaqqissugaanikkut aningaasatigalugullu naatsorsuutigisat pigineqalernissaasa tungaanut ullumikkut aaqqissuussineq atuutiinnarallassalluni.

Ataatsimiititaliap innersuusaasa Naalakkersuisunit akuersaarneqarnerat ataatsimiititaliap nuanaarutigaa. Ataatsimiititaliap naatsorsuutigaa, nutaamik aaqqissuussinerup atortuulersinneqarnissaa pissasoq ataatsimiititaliap Naalakkersuisunit isumasioqateqarluni ataatsimeereerat.

Naalakkersuisut akissuteqaataatigut takuneqarsinnaavoq, sanaartugassat pillugit isumasioqatigiinnissami sanaartugassanut iluarsagassanullu aallaavissatut najoqqutassiinnissamut oqallisissiamik Naalakkersuisut saqqummiussissamaarnerat ataatsimiititaliap naammagisimaarlugu malu-giniarpaa.

Piffissami ikaarsaariarfiusumi akunnerit ilinniartitsiviusussat pillugit Naalakkersuisut akissuteqaataat ataatsimiititaliami amerlanerussuteqartut Siumumeersut, Atassummeersup Kattusseqatigiinneersullu tusaatissatut tiguvaat. Taamaammatt siunnersuutip aappassaanneerneqarneranut isumaliutissiissummi oqaatigineqaraluartutut tassunga tunngatillugu allannguutissatut siunnersuuteqaqqusineq ataatsimiititaliami amerlanerussuteqartut pisariaqarsorinngilaat.

Ataatsimiititaliami ikinnerussuteqartup Inuit Ataqaatigiinneersuup ataatsimiititaliap inassuteqaataa aalajangiussimaannarusuppaa kissaatigalugulu allannguutissatut siunnersuumik saqqummiussisoqassasoq, taamaasilluni piffissami ikaarsaariarfiusumi atuartunut akunnerit ilinniartitsiviusussat ikilisinneqaqqissanngimmata.

Siunnersuutip pingajussaaneerneqarnissaanut siunnersuutip aappassaanneerneqarnerani Naalak-kersuisut akissuteqaamminni allannguutissatut siunnersuuteqassamaarnermittut allannguutissatuut siunnersuutaat ataatsimiititaliap isumaqatigiittup isumaqatigaa.

Isumaliutissiissutip tunniunneqareernerata kingorna kattuffinnit soqutigisaqatigiinnit IMAK aamma KANUKOKA-mit saaffiginnissutinik ataatsimiititaliap tigusaqarpoq. Saaffiginnissutit taakku ataatsimiititaliap sukumiisumik misissorpai, kattuffiilli uparuaataat paasilluarpai sutigullu tamatigut malissinnaanngikkini oqaatigisariaqarlugu.

Peqqussutissatut siunnersuummi akunnerit ilinniartitsiviusussatut aalajangiussat KANUKOKA-p naammaginartutut isiginngilai. Ataatsimiititaliamit Naalakkersuisut akissuteqaataannut innersuussisoqassaaq, tassanimi uparuarneqarmat akunnerit amerlanerusut pitsaassutsikkut angusat pitsanngoriartissagaat ilimanaateqanngimmat. Peqqussutissatulli siunnersuutip nutaap atuartitsinerup

pitsaassusia sukumiissusialu akerlianik qaffariartittussaavai. Taamaammat ataatsimiititaliaq isumaqarpoq akunnerit ilinniartitsiviusussat siunnersuummi aalajangersarneqartut atorlugit atuartut angusassaattut naatsorsuutigineqartut atuartitsinerup ingerlanneqarnissaanut naammattutut isigisariaqartut.

Atuarfiup pisortaata ilinniartitsisutut ilinniagaqarsimasuunissaa siunnersuummi saqqummiunneqanngimmat IMAK-ip pitsaanngitsutut uparuarpa.

IMAK-mit tunngavilersuutitut saqqummiunneqartut ataatsimiititaliap isumaqatigiittup taperserpai Naalakkersuisunullu inassuteqaatigalugu siunnersuummik saqqummiussisoqassasoq, taamaa-silluni § 43 imm. 1-mi oqaaseqatigiinnut kingullernut ima ilanngussuseqassalluni: "...Pisortatut atorfinitsinneqartup atuartitsinikkut pisinnaasaqarnissaa piumasaqaataavoq".

Ataatsimiititaliami ikinnerussuteqartup Inuit Ataqtigiinnersuup ilanngullugu kissaatigaa IMAK-ip allannguutissatut siunnersuutaat naapertorlugu, § 48 imm. 2 imatut oqaasertaqalissasoq: "Peqqissummi pineqartumi Naalakkersuisut aalajangersakkanik aalajangersaasussaattillugit, taakku akuersissutigineqarsimassapput nalunaarutigineqarsimassallutillu ima piffissaliilluartigaluni, ukioq atuarfiusoq 2003/2004 piareersarneqarsinnaasunngorlugu".

Ataatsimiititaliami amerlanerussuteqartup Siumumeersut Atassumeersup Kattusseqatigiinneersullu meeqqat atuarfiat pillugu Inatsisartut peqqussutissaattut siunnersuut, ataatsimiititaliami amerlanerussuteqartut taamatullu ataatsimiititaliap tamarmiusup kaammattuutaannut naapertuuttumik Naalakkersuisut pingajussaaniinerissamut allannguutissatut siunnersuutinik saqqummiussereerpata, taamatut iluseqarluni akuersissutigineqassasoq inassutigaa.

Ataatsimiititaliami ikinnerussuteqartup Inuit Ataqtigiinneersup Naalakkersuisut ataatsimiititaliami ikinnerussuteqartup taamatullu ataatsimiititaliap tamarmiusup kaammattuutigisaannut naapertuuttunik pingajussaaniinerissamut allannguutissatut siunnersuummik saqqummiussaqaareerpata meeqqat atuarfiat pillugu Inatsisartut peqqussutissaattut siunnersuut akuersissutigineqassasoq inassutigaa.

Inatsisartut Kultureqarnermut Ilinniartitaanermullu Ataatsimiititaliaat taama oqaaseqarluni meeqqat atuarfiat pillugu Inatsisartut peqqussutissaattut siunnersuut pingajussaaniigassanngortippaa.

Ruth Heilmann, Siumut  
siulittaasuugallartoq

Lars Karl Jensen, Siumut

Jakob Sivertsen, Atassut

Olga Poulsen, Inuit  
Ataqatigiit

Mogens Kleist,  
Kattusseqatigiit

